

INUIT ATAQATIGIIT

INATSISARTUNI



UKA2021/014

18. november 2021

Sofia Geisler

Nunanut Allanut tunngasutigut naalakkersuinikkut ingerlatsineq pillugu nassuaat 2021.

(Nunanut Allanut Nukissiuuteqarnermullu Naalakkersuisoq)

Aallarniutigalugu Naalakkersuisut 2021-mut nunanut allanut tunngasutigut naalakkersuinikkut ingerlatsineq pillugu nassuaataannut qujavunga.

Nassuaatip aammaarluni naqissuserpaa Kalaallit Nunaat avatittalu illugiissumik attaveqarnerisa inuiaqatigiinni pissutsinut atukkatsinnut qanoq aalajangiisutiginersut. Taamatullu Kalaallit Nunaata siunissaanut.

Ullumikkut nunanut allanut tunngasutigut maani oqallissinnaanitsinni peqqutaapput inuit namminersornerulernissatta namminersulernissattalu tungaanut inatsisitigut sinaakkusiussat iluanni nunanut allanut attaveqarnermik pilersitsisimasut, qutsatissaqarfigisavut.

Qularnanngitsumik killissat pillugit unammilligassaqaqtarsimassapput maani nunatsinni politikkikkut ingerlatsinermi, kisianni aamma naalagaaffeqatigiinnerup sinaakkutaanut atatillugu.

Taamaattoqarsimannngikkaluarpat aamma eqqumiippallaassaqaaq. Silarsuaq allanngorartuarpoq, ataatsimoornerput suleqatigiinnerpullu tatineqartarpoq, tamanna aamma siunissami qularnanngitsumik pisassammat.

Ilisimasaqarneq pissaaneqarneruvoq

Tassunga assersuutit ilagaat attaveqaqatigiinnermut ataatsimiitaliaq oktobarip sisamaani 2021-mi Statsministeriami atsiorneqarluni pilersinneqartoq. Ministerit qulit nunatsinneersut, Savalimmuniueersut

INUIT ATAQATIGIIT

INATSISARTUNI



Danmarkimeersullu attaveqaqatigiinnermut ataatsimiititaliami tassani ullumikkut issiapput nunanut allanut, sillimaniarnermut illersornissamullu politikkimut tunngasunik sulianik aallutaqarlutik. Tassuunakkut siunissami qulakkiissavarput nunarput pillugu paassisutissat tamarmik pissarsiarineqartarnissaat.

Nunarput pillugu nunatsinnillu tunngasunik pitsaanerusumik paasisaqarnerusalissaagut. Nunat taakku pingasut akimorlugit illersornissamut, sillimaniarnermut nunanullu allanut tunngatillugu politikkikkut ilisimasat assigiit pissarsiarisalissavavut.

Ilisimasaqarneq pissaaneqarneruvoq, taamaammat nunatta Danmarkillu akornanni pissutsit eqqaaneqartut pillugit annerusumik ilisimasaqalerneq pissaaneqarnerup oqimaaqatigiinneruleraneranik kinguneqassaaq.

Oqartussaaffinni nunatta akisussaaffigilereersimasaannut taakkulu nunanut allanut politikkikkut attaveqarneq eqqarsaatigalugu, kiisalu oqartussaaffinni suli danskit naalagaaffianiit oqartussaaffigineqartunut tunngatillugu, ullut arlaanni oqartussaaffiit taakku nammineq akisussaaffigilernissaasa tungaannut.

Qanga arnat angutillu inersuarmi maani oqallittarfinnilu allani sunniutilerujussuarnik aalajangiisimanerat peqqutigalugu ullumi maani inisisimavugut, taamanikkumullu sanillersuukkutsigu inisisimaffipput oqartariaqarpugut suleqatigiinneq qangamut sanilliullugu oqimaaqatigiinnerujussuovoq naligiinnerujussuullunilu. Sulili suliassaqarpugut, Nunatta Danmarkillu akornanni peqatigiinnermi naligiimmik ataqeqatigiinnerup tatigeqatigiinnerullu siuarsarneqarnissaanik kissaateqarnerup - nunanut allanut – sillimaniarnermut – illersornissamullu politikki eqqarsaatigalugit - anguinnissaanut.

Attaveqaqatigiinnermut Ataatsimiititaliap pilersinnejnarera taamaattumik aalajangiinerit annerit akornanniippoq, taannalu siunissami Inatsisartuni,

INUIT ATAQATIGIIT

INATSISARTUNI



Nunanut Allanut Sillimaniarnermullu Ataatsimiititaliami aammalu
Naalakkersuisuni sulinermi aalajangiisorujussuanngorsinnaavoq.

Eqqumaffigivarput Nunatta nammineq Issittumut tunngatitaminik
periusissiornera Naalakkersuisunit maanna suliarineqarmat,
pingaaruteqaqaarlu tamatuma inissinnissaa. Pingaaruteqarpoq
Naalagaaffeqatigiinnerup iluani nunat Issittumi inissimanertik namminneq
aallaavigalugu suliaasa suleqatigiissutigilluarnissaat ataqatigiissarluarnissaallu.

Qaqugorsuarmut atasinnaasunik aaqqiissuteqartarneq

Kalaallit Nunaat EU-miit 1985-mi avissaarpoq. Taamaakkaluartoq nunatta EU-
llu akornanni suli qanumut attaveqarneq ingerlavoq, tassami EU Nunatta
Karsianut annertunerpaamik Naalagaaffeqatigiinnerup avataaniit
aninggaasalersuisuummat. Maluginiassallugu soqtiginarpoq EU-p Issittoq
pillugu periusissiaani nunap inuuisa kulturiminnik inuuniarnermilu
toqqammavigisaasa pingaaruteqassusiat eqqaaneqarmat. Tamanna
pingaaruteqarpoq, tassami EU-p nammineq aammalu nunat ilaasortani kisiisa
pillugit nunatsinnut aninggaasaliisarnera kisimi pineqannginnami, aammali
pineqarmat aningaasat Issittumi nunatta inisisimaffini peqqutigalugu
ilaaffigisaani sillimaniarnermut, patajaallisaanermut, piujuannartitsinermut
atugarissaanermullu siunertaqartumik atugassanngortinneqarnerat.

Pingaaruteqarpoq nunatta nunanut, tamat oqartussaaqataanerannik
toqqammaveqarluni ingerlatsiviusunut inatsisinillu toqqammaveqarlutik
aunneqartunut attaveqarnerata nukitorsarnissaa. Inuit Ataqatigiinniit
nalornissutiginagu kissaatigaarput siunissami sivisuumik
attanneqarsinnaasumik toqqammaveqartumik nunanik allanik attaveqarnermik
pilersitserusunnerput. Ukiut tallimat kisiisa eqqarsaatiginagit, kisiannili aamma
ukiut 20-it taakkuluunniit sinnerlugit sivisutigisumik atuuttussamik.
Assersuutigisigu Europami nunat ataatsimoorfiat EU, ungasinnerusoq isigalugu

INUIT ATAQATIGIIT

INATSISARTUNI



attanneqarsinnaasumik attaveqarfigineqarsinnaasutut maanna
suleqatigisarput.

Kingumut qiviaqqilaartariaqarpunga. Taamanikkut politikerit atorfilitallu maani
Inersuarmiissimasut aammalu Naalakkersuisut allaffeqarfiiniissimasut EU-mik
suleqateqarnissamik isumaqatigiissuteqarsimasut, aammalu ullumikkut
ilinniartitaanerup tungaatigut aningaasanik atugassatsinnik
amerlanerulersitsisumik uagutsinnut periarfissiisimasut. Politikerit atorfilitallu
isumaqatigiissuteqarnermut tunuliaquatasut, piginnaasaqarsimapput siumut
isiginissamut, aammalu ima isumaqatigiissuteqarsinnaasimallutik, allaat
tamanna ullumikkut nunatta iluaqutigisinnaalerlugu. Inuit tamakku
nersussavavut, naak amerlasuut akunnitsinniikkunnaarsimagaluartut.

Suliarujussuat pisussaaffiliivoq. Maani inersuarmi Inatsisartunut
ilaasortaasunut, Naalakkersuisunut aammalu nunanut allani aallartitaqarfitsinni
atorfilittatsinnut. Pitsaasumik attaveqalernissarput qulakkeerniarlugu,
aammalu nunatsinnut iluaqutaasumik nutaanik annertunerusumillu
attaveqarfissatsinnik pilersitsinissatsinnik piorsaanissatsinnillu.

Nunanut allanut politikki nunami namminermi pissutsinut aamma ilaavoq

Nunanut allanut politikki tassaaginnanngilaq angutit habitimaartut aammalu
arnat assukkersorsimasut, qillalaartumik natini ulloq naallugu
ataatsimiinnerinnaat, imaluunniit qungujungajallutik imminnut isigisut.

Nunanut allanut politikki aamma tassaavoq inunnut, aalisakkerivinni sulisunut
tunngasoq. Kilisaatinut avataasiorlutik raajarniartunut tunngasoq, imaluunniit
angallatinut mikinerusunut sinerissap qanittuani qaleralinniartunut tunngasoq.
Nunanut allanut politikki tassaavoq nioqqtissiatsinnik nunarsuatsinni
pisisartussarsiorneq, akigitinniakkatsinnillu akileruuusuttunik pisisussarsiorneq.

INUIT ATAQATIGIIT

INATSISARTUNI



Taamaasilluta Nunatta Karsia isertitaqarsinnaaqquullugu taamalu utoqqaat iluanni sulisunut, soorlu ikani aqqusernup akiani utoqqarnik aammalu inunnik paaqqutarisariaqartunik isumaginnittunut, akissarsiassaqartitsiniassagatta. Illoqarfinni nunaqarfinnilu tamani paaqqutarinnillutik sulisunut tamanut akissaqarsinnaaniassagatta. Meerartavut inuuusuttortavullu ilinniagarsinnaaniassammata, aammalu peqqinnissaqarfik ingerlalluartoq pisariaqartitatsinnillu isumaginnittoq akissaqartinniassagatsigu.

Taamaattumik nunanut allanut politikki tassaaginnannilaq angutit arnallu assukkersorsimallutik, natini qillalaartuni naapittut assersuutigalugu silap pissusaata allanngoriartornera oqaluuserineqartillugu, imaluunniit nunatta pissaanilissuit ikinnerpaamik marluk akornanni inisisimanera pineqartillugu. Nunanut allanut aamma politikkiuvoq ilinniartitaaneq aqqutigalugu naleqalersitsisarneq. Nunanut allanut politikkiuvoq, utoqqartavut ukiorpassuit sulereerlutik soraarninngortarnerat taamalu utoqqalinersiaqalertarnerat. Nunanut allanut politikkiuvoq nualluummut covid-19-imut nappaatinullu allanut akiuussutissanik kapitittarneq, peqqissuuginnarniassagatta inuiaqatigiillu ingerlaannarnissaannut iluaqutaaniassagatta.

Nunanut allanut politikki nunatsinni periarfissanik pilersitsisarpoq, avatitsinniittut pisartut perusuttaannik nioqquissiassaatsinnik avammut niuersinnaaniassagatta, taamaasilluta isertitaqarsinnaalerluta, taamalu inuiaqatigiinni atugarissaarnissatsinnik toqqammaviliisunut aningaasartuutinut akissaqalerniassagatta. Imaluunniit inuussutissarsiornikkut periarfissanik nutaanik piorsaanitsigut, nioqquissiornitsigut suliffeqarfinnik nutaanik pilersitsilluta suliffeqarfiit taamalu nunatta karsia isaatitsisinnaalersillugu.

Nunatsinni iliuutsitta uagutsinnut nakkussassaataasut avatitsinni nunatta inisisimanera nakuunerulersittarpaa. Sumiiffinni avatitsinniittuni allani iliuuserisavut, taakku aamma nakuunerulersittarpaatigut maani nunami.

INUIT ATAQATIGIIT INATSISARTUNI



Allatut oqaatigalugu nunanut allanut politikki tassavoq nunatsinni siuarsaanissatsinnik siunertaqartoq, nunatta aningaasaqarneranik nukittunerulersitsisussaq, nunanillu allanik niuernitsitta annerulerteratigut naalagaaffimmiit tapiissutit ilaannik matussusiiisussaq. Nunatsinni politikkikkut patajaassuseq malartaasernerlu aalajangiisorujussuupput avataaneersunik aningaasaliisussanik pissarsiniarnitsinnut.

Akisussaassuseqarneq

Avataaniit aningaasaliiumasunut pilerinarsaassaagut, pingaartumik Danmarkimiit, EU-miit USA-miillu, taakkumi qaninnerpaasumik iligivavut, imaluunniit nunaniit allanit, nunatsinni inatsisiliornitsinnut ataqqinnittunut maani aningaasaliinissamut pilerinarsaassaagut. Taamatut iligisatsinnik ikinngutitsinnillu allanik suleqatigiinnissamut piumassuseqarneq imatut isigineqassanngilaq, nunat allat nunatsinnit suleqateqarnissaannik mattunneqartut. Nunarput nunanik allanik suleqateqarnissamut ammasuuvoq.

Nunatta avatangiisink innarliinngitsunik atuilluni nukissiuuteqarnikkut - tassani pivagut imeq, anori aamma seqernup nukinga - imminut napatinneranik anguniagaqarnerput toqqammavigalugu siunissamut attanneqarsinnaasumik aningaasaliinerit ingerlanneqassapput. Digitalimik attaveqaativut piorsassavavut, taamaasillutik innuttaaqataasut internettimut akikitsumik pitsaaneruseumillu attaveqalerniassammata. Siunissami attanneqarsinnaasumik inuussutissarsiutitigut ineriertortitsinermi tamanna aallaaviuvoq pingaaruteqartoq.

Nunanut allanut politikki aamma nunanik allanik isumaqatigiissuteqarnissamut annertuumik pingaaruteqarpoq, nuna tullaarisarput illersorniarlugu sulinitsinni suleqataaneq tutsuiginartumik naligiissumillu toqqammaveqartumik peqataaneq. Aamma tassaavoq nunatsinni pingaartitatta aammalu avataaneersut suleqatigisatta pingaartitaasa oqaloqatigiissutiginissaat.

INUIT ATAQATIGIIT INATSISARTUNI



Nunarsuarmioqataavugut, aammalu nunarsuarmi pisunut akisussaaqataarusuppuget. Nunani tamalaani inissisimanerput nukittorsartariaqarparput aammalu nunat nalitsitut eqqarsartartut suleqatigissavavut, tamat oqartussaaqataanerannik ataqqinnittut, malittarisassanik toqqammaveqarluni nunarsuarmi malinnikkusuttut aammalu nunani tamalaani pisussaaffinnik ataqqinnittut suleqatigissallutigit.

Taamaattumik Parisimi isumaqatigiisummut peqataalissaagut.

Takutissavarput akisussaaffimmik tiguseqataasinnaalluta. Tassami silap pissusiata allanngoriartornera nutaamik pissutsinik naleqqussarfigisariaqakkatsinnik malitseqarpoq.

Kinguaariinnut tulliuttunut iluaqutaasumik aaqqiissutit

Silaannaap allanngoriartornera maannakkutut sukkatigaluni pissappat, taava Issittumi siku 2050-mi nungoreersimassaaq. Meeqqat ukioq manna kingornalu inunngortut, taamanikkusamut 28-niit ukiinnerussapput. Tassa imaappoq kinguaariit taakku taamanikkusamut arfernik aammalu imaani uumasunik allanik nerisaqarnavianngillat, tassami uumasut ingerlaarfii allanngorluinnartussaammata. Imaluunniit nungussimasinnaallutik.

Issittoq ullumi ilisimasarput siku peeruppat allatut nalilersortariaqassavarput. Imaalluarsinnaavoq issittoq oqaluttuaannanngorsimassasoq. Tamanna uagutsinnik pisussaaffiliivoq siumut pisussanik eqqarsarnissatsinnut, kingumuunngitsoq. Meeqqat inuusuttullu taamanikkussamut atugarilerumaagassaat eqqarsaatigalugit nalilersuisariaqarpugut periarfissanillu inerisaalluta.

Issittumi sukkasuumik kiatsikkiartorpoq inuuniarnitsinnut imaannaanngitsumik sunniuteqassalluni, niuerakkulli periarfissanik nutaanik ammaassaaq aammalu pinngortitap pisuussutaanut allanut atuinissamut periarfissiilluni, taakkulu piujuannartitsinermik toqqammaveqarluta atorluassavavut. Kalaallit Nunaata

INUIT ATAQATIGIIT INATSISARTUNI



nunarsuarmioqataasutut pingaaruteqassusia suli qaffakkiartussaaq. Tamanna pisussaaffiliivoq Issittup piujuannartitsinermik toqqammaveqarluni ineriertortinneqarnissaa anguniarlugu akisussaassuseqartumik iliuuseqarnissatsinnut.

Pijuuaannartitsineq, nungusaataanngitsumik atuineq, isumaqarpoq akisussaassuseqarneq. Akisussaassuseqarneq isumaqarpoq nuanniitsunik nuannarineqanngitsunillu aalajangiisariaqartarnissarput. Taamatulli iliortariaqarnerneq sumik tunngaveqarnersoq pikkorinnerulluta nassuiarsinnaasariaqarparput.

Kalaallit Nunaat, qitiusumik inissismalluni peqataasoq

Aallarnisaanermut nutaaliornermullu nutaanik namminersortullu suliffeqarfiutaanni suliffinnik pilersitsinissamik siunertaqtunik siunissamullu sivisuumik attanneqarsinnaasunik aqquqtiissiuussinermi sinaakkutissat ersarissut pilersikkusuppavut. Inuussutissarsiornikkut toqqammaviliisussat ineriertortinneqassapput nunanik allanik suleqateqarnitsigut avataaniillu aningaasaliisussanik pilerisaanitsigut, tassanilu pivagut aalisarneq, taamalu aatsitassarsiorneq takornariaqartitsinerlu. Inuussutissarsiornikkulli toqqammavik pingarneq tassaannginnerpa ilinniartitaanikkut inerisaaneq aammalu inuussutissarsiutitigut inerisaaneq nutaaliornertalik. Periarfissanik akorseriaasinnaanerput naak nalunngikkaluarlugu iluatsitsinngitsoornissaq aamma periarfissaasoq.

Inuit Business Council (IIBC) aamma Arctic Economic Council (AEC) suleqatigissavavut Issittup nunarsuup ilaatut aningaasalersuiffigissallugu soqutiginartutut inissisimanera nukitorsarniarlugu. Nunap aqunneqarnerani ingerlatsineq patajaatsoq tatiginartorlu nunatta aningaasaliiffigineqarusunneranut qaffassaataasaaq.

INUIT ATAQATIGIIT

INATSISARTUNI



Kalaallit Nunaat Issittumi qitiusumik inissismavoq, tamannalu Issittumi Siunnersuisoqatigiinni inissismaffitta takutippaa, sulilu nukittunerulersikkumavarput. Kalaallit Nunaat aamma Nunani Avannarlerni Siunnersuisoqatigiinni aammalu Issittumi Qinikkat Suleqatigiiffinni namminerisamik sinniisoqartariaqarpoq.

Nunanut allanut politikkikket annertunerusumik sunniuteqarnissamut aqqutissat ilagivaat ilisimatusarnikkut nukittorsaaneq, siunnerfilimmik piginnaasat annertusartariaqarlutik taamaasilluni ilisimatuut nunatsinniittut ilisimatuut nunanit allaniittut suleqatiginerisigut nunanut allanut sillimaniarnermullu politikki eqqarsaatigalugu ilisimasat annertusarnissaat anguniarlugu.

Nunatta pingaartitaanik kulturi aamma oqaluttuarpoq. Qanga pisimasunut, maannakkumut pisunut siunissamilu pisussanut tunngatillugu kiisalu kulturitta avammut nittarsaaneqarnera nunanut allanut politikkitta ilagivaa. Kulturerput oqallinnermik pilersitsisarput, nunat allat kulturiinut ikaartarfittut taaneqarsinnaalluni. Niuerutigineqarsinnaasutut isigisariaqarpoq ineriartortitassarput, taamaasilluni inuussutissarsiutivittut nunatta avammut nunani tamalaani nittarsaanneranut atorlugu ilisarnaatigilerlutigu.

Illersornissamut sillimaniarnermullu politikki

Illersornissamut sillimaniarnermullu politikki tassaasarpoq innuttaasut illersornissaat, killeqarfiiit illersornissaat kiisalu nap soqtigisaasa pingaartitaasalu illersornissaat.

Illersorneqartutut misigisimassaagut, eqqissilluta sinissinnaassalluta, avataaneersut killeqarfitsinnut susassaqaratik appakaatinnginnissaat nakkutigineqarluni, kiisalu atortulersuutit pilersuinerlu piaaraluni innarlerneqannginnissaat nakkutigineqarluni.

INUIT ATAQATIGIIT INATSISARTUNI



Inuit Ataqatigiinniit naqissusissavarput partiip pilersinnejnarneraniit sulissutiguaratigu anguniartuarlugulu sakkussakillisaaneq. Akuerinngilarput sakkussalerngusaanneq.

Partiuvugulli aamma piviusorsiortoq.

Takorlooruminaappoq maannakkutut aaqqissugaasumi nunatta illersorneqarnerata taamaasillunilu naalagaaffeqatigiinnermi soqtigisat illersornerisa peerunnissaat – allamik taartissaqartinnginnatsigit.

Allamik taartaasinnaasumik siunitsinni peqarnera takujuminaappoq. Tassami nammineerluta illersornissaqarfimmik peqanngilagut, nammerisatsinnillu upalungaarsimatitaqarata killeqarfiup innarlitsaalineranut suliaqarsinnaasunik.

Issittoq, taamalu Nunarput, nunanit pissanilissuarnik isigineqarneruartaunnarpot soqtigineqarnerujartorlunilu.

Aporaassutigisat sakkortusiartorput tatisisoqarneralu annertusiartortillugu iligisat kikkuunerinik toqqaasariaqarnissatsinnik pinngitsaalineqartutut ippugut. Soqtigininneq annertusiartortillugu aporaaffiusinnaasut pilernissaat periarfissagissaarnerulerlarpoq. Taamaattumik politikkitsinni qitiusoq tassaavoq suleqatigiinneq aqqutigalugu sakkussakillisaanerup taamaattuarnissaa.

Eqqissineq ineriartornermut toqqammaviliivoq. Eqqissisimaneq sakkussakillisaanerlu uagutsinnut toqqammaviupput aalajangiisuulluinnartut. Kissaatigingilarput sakkussalerngusaanneq. Suliniutit sakkutooqarnermik imallit siunertaqassapput sakkussakillisaanerup attatiinnarnissaanik.

Tamanna Inuit Aqatigiit politikkiannut qitiuvoq, tassami Folketingep akuerisaani kapacitetspakkenimi issittumut tunngatinneqartumi qitiussaartaaq

INUIT ATAQATIGIIT

INATSISARTUNI



nunarujuussuup nakkutigineqarnissaa. Sakkussalerngusaanneq tassani pineqassanngilaq. Tamannalu Naalakkersuisut qulakkiissavaat.

Nakkutilliinerup annertusarneqarnera, eqqissisaanermik siunertaqartunut suliniutinut annertunerusumik kalaallit peqataanissaat kiisalu killeqarfiup nakkutigineqarnera Naalagaaffeqatigiinnerup iluani inerisarneqassapput, tassani NATO-mut ilaasortat allat suleqatigineqassallutik. Kalaallit Nunaata nunanut allanut sillimaniarnermullu politikkimut tunngasunik akuutinneqarnerulernerata saniatigut, USA-mik, EU-mik Nunanillu Avannarlernik qanimut pitsaasumillu suleqateqarneq piorsarneqassapput, tassani siunertaq pingaardeq tassaassalluni sakkussakillisaanerup allangutsaaliornissaa, aqqutigineqassaarlu sakkortusaartuunngitsumik sillimaniarnermut politikki.

Nunatta nammineerluni illersornissakkut tunniussassaa

Inuaqatigiit sinnerlugit isumagisassat naammassinissaat immikkut ukkataralugu Issittumi Sakkutooqarfik siunertaqartariaqarpoq, piffissallu ingerlanerani kalaallit amerlanerujartuinnartut tassunga peqataassapput. Pineqartut tassaapput piginnaanngorsaaneq kiisalu sakkutuujunngitsutut atorfiit Issittumi Sakkutooqarfimmiiittut.

Killeqarfiup innarlerneqannginnissaa qulakkeerniarlugu suliaqarnerup saniatigut ujaasisarnermut annaassiniarnermullu suliat (SAR) suliffeqarfinniit nunatsinneersuniit aammalu peqatigiiffinit namminneq piumassuseq aallaavigalugu ingerlanneqartunit isumagineqartariaqarnerat pissusissamisoortut isigaarput, soorlu assersuutigalugu kommunini upalungaarsimatitat, qatserisartut, kommunit, snescooterertartut peqatigiiffii minnerunngitsumillu Air Greenland, kingulleq eqqarsaatigalugu piffissami 2021-miit 2030-mut Illersornissamut ministeriaqarfimmut

INUIT ATAQATIGIIT INATSISARTUNI



isumaqatigiissuteqarsimasoq annaassiniartarnermullu taamaasilluni akisussaasoq.

Kangerlussuup mittarfiata illersornissaqarfimmiit atuinnarnissaa pillugu Danskit naalakkersuisuisa Naalakkersuisullu akornanni 2019-mi isumaqatigiissutaata piviusunngortinneqassaa pisariaqarpoq taamalu mittarfiup ataannarnissaa qulakkeerinneqassalluni.

Kalaallit tamaanilu suliffeqarfiit Illersornissaqarfiup suliassanik isumaginninneranut akuunerusariaqarput.

Illersornissaqarfiup sakkutuunngorniarluni ilinniartitsineranut nammineq piumassuseq aallaavigalugu ingerlatserusuttunut periarfissaq atuuttariaqarpoq, tamannami inuusuttatsinnut periarfissiimmat malitassaqarluni inuunermik nukittorsaanermut, ataatsimoornermik misigisaqarnissamut ilinniarnissamullu. Inuuusuttatta pinngortitamut, oqaatsinut nunallu immikkortuinut ilisimasaqernerat Illersornissaqarfimmut iluaquterujussuussaaq, tamannalu atorfinnermi aningaasarsiatigut aamma ersersinneqartariaqarpoq. Piginnaasat pingaaruteqarput, soorlu assersuutigalugu nammineq piumassuseq aallaavigalugu Kalaallit Nunaanni upalunaarsimasutut nakkutilliisui "Grønlands vogterne" eqqarsaatigalugit, kiisalu annaassiniartarnermi ikuullutik akuusartut eqqarsaatigalugit.

Nunarsuatsinni sorsunnernut sakkutuutut akuusimasut Nunatsinniittut akuerisariaqarpagut tapersorsorlugillu. Taakku pillugit kommuneni ilisimasat piginnaasallu annertusartariaqarput, pineqartullu pillugit nammineq kajumissutsiminnik suliaqartut tapersorsorpagut.

Naggasiut

Sammisaq pillugu oqaaseqarsinnaagatta qujavugut, kaammattuatigerusupparpullu oqallinnermi aallaavigissagipput nunanut allanut

INUIT ATAQATIGIIT INATSISARTUNI



tunngasunik pissutsit amerlasuut isumaqatigiissutigiisutigeriikkagut. Avatitsinniit soqutigineqarnitta sumut ingerlanissarput aqussanngimmagu pingaaruteqarpoq. Ataatsimoorluta, qinikkatut, uagut siuttuulluta nunatta ineriartornera aqqutissiuutsigu.

Naggasiutigalugu kissateqarfigerusuupara nunanut allanut periusissiatta nammineq pilersitatta ukioq manna naammassinissaa, tamatumalu kingorna Kunngeqarfiup Issittoq pillugu Periusissiaa Danmark suleqatigalugu naammassillugu, tamatumanilu sooruna aallaaviussasut nammineq pingaartitavut.

Qujanaq.